

Fida Nyamesemka: Dzifuu30, 2013.

(Friday sermon –30<sup>th</sup> August, 2013 – Fante Translation)

**JALSA SALANA UK 2013 (ODODOW EHYIADZI WO NGYIRESI  
ABOROKYIRMAN MU) NA AHCHOYE.**

Ber a okrantsee tashud, ta'awuz na Sura Al-Fatiha wiee no, Huzuur kaa de: Fida a wabesen kor no, mekaa asodzi a oda afrefo hon do a owo de wohye no ma ma atonsafrefo no. Na oye hen asodzii de yesom Anohoba Mesia (ANN) no n'ahohoe wo ope na enyigye mu. Nde mepe de meka ahyedze a oda ahoho no hon do, dembre obeye ma wobohu dza ofata de woye wo Jalsa yi ase. Iyi bema woehu hia a ohia de wobeye hon a woreye Jalsa noho ntotoe bataboa.

Ahyedze ebien na oda ohoho biara do. Dza odzi kan nye de wobohu Jalsa yi no botae na woetum ahye no ma. Dza otodo ebien nye de wobonya suahun nye sunsum na woenya nyimdzi a wobema woetu honho fo ama woenya abrabo mu mpontu na woenya ntseasee onnyi de yeper hen ndzenoa nkotsee. Mbom yensua de owo de yeye dza ofata hen nye hen nuanom nye dza owo de yeye dze boa hen nkorfo.

Se yeka de yeye Anohoba Mesia (ANN) no n'akadofa dza, ono owo de yehye hen ahyedze nyimara ma. Asodzi a owo de yeye ma hen ahohoe no, yebeye no nyinara na dza ohia kese nye de yebeye ndaasefo kese ama Nyankopon de Wama yeenya dem ahoto nye ndzamba a nna bi nnyi bea yi do dadaw. De bmre hom benya ahoto wo hom asetsena mu wo bea yi do no, m'edzi kan aka wo me Fida nyamesemka mu de, Nkomhyenyi Kronkron Muhammad (NNN) ahye hen de yennya nkitahodzipa mma henho na yemmfa enyigye na serew nhya hen ahohoe. Bio, ahoho a waba nye hon a wonam kwan do reba nyinara mmfa ndaase kese mma Nyankopon de Wama hen ndzamba a obema hen ahoto wo Jalsa yi ase.

Me Fida nyamesemka a abesen no, mekaa Nkomhyenyi Kronkron (NNN) no n'anumsem a okyere de, oye hen ahyedze de yebedzi nkitaho wo enyigye na yeaserew akyere henho. Mbom, Jalsa yi da ho dzi mu, se yedze to Jalsa a woye no wo wiadze ne fa bi a, osiande mpirempiren nhyehyee pii wode woye ma dom a hon dodow beye opepe eduasa (30,000), nkanka se nsu to a oma ohaw kese ba anamon kwan no mu onye dabew mu. Ofa no ohaw a anamonkwan dze ba no yetum sow ano ara yie a woyi nsuka toto ho, mbom ntamadan no a woewisi aye no dabew no na edziban ho nhyehyee na ndzamba bi so da ho wo ho a yenntumii nnsiw ano yie. Na oye Nyankopon Ne pe a mber bi beba a dem ndzamba nyinara yebesisiw anon a dem mpirempiren kurowpon botum adan aye kurowpon a obetsim ama Ahmadiyya Jama'at. De mbre mekaa no dem dwumadzi yi ye mpirempiren adzeye na dwumadzi yi ne kesenara hon a woetu honho akye a wofi Khuddam Kuw no na Ansarfo wotse hon mpow mu no na wodzi. Jumma a etwa mu no mokopuei Hadeeqatul Mahdi na muhun, dem mber no, se yedze hon a woridzi roti efir noho dwuma no si nkyen a, mbofra na mbrentse na nkodaa reye edwuma a ofata hon na worobo mbodzen reye dza wobotum ama esigyina de nhyehyee a ofa Jalsa noho no woedzi ho dwuma ma ako yie mapa. Ha so, mepe de mema oda edzi de roti efir ne nhyehyee no nnye edwumakuw biara a onnyi Jama'at no mu

no nna woetu hōnho ama, hōn a wōawia mfirdwuma ho na nkorōfo a wōwō nyimdzee mapa wō ndzēmba bi ho na wodzii.

Ketseankyē Allah Ɔsorsornyi No ayē hōn adom wō edwuma a wōyēē yi ho. UK dwumadzi no dze, dza ohia ara nye dē wobedzi, ɔntse dē dza osi wō India anaa Pakistan a kwan a wodua do dzi dwuma ɔmmfa obiara ho no osiandē wōnnhwehwe hōn dwumadzi no mu. Wodzi dwuma dē ɔyē ntwamuhēn. Sē dadzehoma sensen hō a ɔno wōma ɔsensen hō anaadē mbre ɔbēyē no ɔnyē. Ɔntse dem wō ha. Ha dze mpenpendo biara wōhwe mu yie na Aban edwumayēfo ba bōbō ho aprōw na ɔgye to mu ansaana etwa edwuma do. Allah, Ɔsorsornyi No N'adom ntsi nhyehyēē a ɔwō roti efir na gyaadze ho nyina wodzii do wōmaa ho kwan dē wōnyē. Dza morohwehwe aka nye dē ɔnam dē ekehia dē wōyē mpirempiren nhyehyēē a ɔso ntsi ɔwō dē yeku hēntsin yē edwuma- sē yēdze hēn dze to mbeambea binom hōn dze ho a, na Allah N'adom ara Ahmadiyya etuhoakyēfo dze aho nkenyan kēse dzi dwuma. Dem sunsum, dē yebotu hēnho ama ɔnam Jama'at yi ntsi nye Ahmadiyyanyi n'ahyensew.

Ahmadiyyafo bō afōr biara. Ndadzendadze Kuw (Engineers Association) wō hō a woridzi hōnara hōn dwuma. Adatser Kuw wō hō a woridzi hōnara hōn dwuma. Afei binom so wō hō a wōawea edwuma ahorow ho a wōdzhōn mber ma ..... na iyinom a ɔyē Jalsa ho edwuma nko no, osi wō afe kwansin no mu. Iyi yē adze a ɔyē nwanwa na ɔyē soronko ma Ahmadiyya Jama'at a ɔma wōyē etuhoakyē edwuma kēse. Edwumaho ntsetsee na nwomasua nna ekowie dem yi nkanka ara sē yehwe hēn kusum a yēdze som atonsafrefo a wōwō Jalsa hō- dem kusum yi nye ampaara, Ahmadiyyanyi no dwumason. Mbofra, mbrentse na nkōdaa dze enguan, hōn nyinara edwuma ho sunsum ahyē hōn ma. Edwuma biara a wōdze hyē hōn nsa no wōdze etuhoakyē sunsum yē. Na ɔwō dē ɔba no demara osiandē atonsafrefo a wōba Jalsa hō no ampaara dē wōyē Anohoba Mesia (ANN) no n'atonsafrefo.

Dem ntsi dem ahōhosom yi yē brapa ne nkyerēē na mbre hōn gyedzi tse. Mepē dē mema obiara n'aso tse dē, mbre Anohoba Mesia (ANN) no sii dzii ne ndwuma a ɔfa no ahōhosom ho ntsi hēn ahōhosom ne mpenpendo wōdē ɔkō sor na mpo odzi mu kō kan. Da kor bi, Anohoba Mesia (ANN) no nna noho mmfa no ma ɔrohom. Nsatofrefo bi kōr dē ɔrokōhwehwe no ma wōmaa n'aso tsee ma opuei bēka dē nsatofrefo no wō ho kwan dē wōsom no hōho osiandē obereē ana ɔreba hō. Dem ntsi oefir edzi dē ɔrebedzi no dwuma ama nsatofrefo no. Dem ntsi ndē so, ahōhosom a ɔtse dem yi wōkyerē kyere Anohoba Mesia (ANN) ne nsatofrefo no osiandē kwan a wōdze rema hēn ndē yi nye dē yēbēgye ahōho a wōyē Anohoba Mesia (ANN) dze eso wōyē nsatofrefo a wōnam nyamesēm ho. Wōreba osiandē wōpē dē wōtse nsem a ɔfa no Allah na Ne Somafo Nkōmhyenyi Krōnkrōn Muhammad (NNN) ho. Wōreba osiandē wōpē dē wonya sunsum na ɔbrapa mu kankō. Wōreba ha osiandē wōpē dē wōma anyenkoye mu ɔdō na korye tsim eso no mu yē dzen.

Nsatofrefo pii wō hō a wōnam ahokyer na ɔhaw bodwirir ha. Binom tsetse ahokyer a ɔyē dzen wō hōn efiefi. Wōba ha besēē mber wō tsebea a ɔyē dzen mu. Eso woyi iyi nyinara akwa na wōba. Binom fi ohia kokobin mu na wōba, wōdze hōnho to adzesoadze a ɔyē dur do ama woenya Jalsa nhyira. Anohoba Mesia (ANN) ne nhyedo ntsi na wōba; na wōnam new frē do. Wōba behyia mber yi do Khalifa na wotsie ne kasaa. MTA, ekyingye biara nnyi ho dē

Ahmadiyya ne wiadze aben ho mbom Jalsa ne ntwaho na noho akɔndɔ noara mpo twe noho na ɔda noho edzi soronko. Ntsi mma yenndwen “ahokyer” a nde mber yi ɔwɔ ho a nsatofrefo rokɔ mu a wɔdze ba Jalsa no. binom wɔ ho a hɔn enyin efir papaapa a wɔnnhwe yaw na fona ahorow a hɔn akwantu dze ma nasɔ wɔba Jalsa. De mbre m’aka no, binom dan hɔn ahoto na awerekyekyer a ɔwɔ hɔn efiefi ɔnam gyedzi ntsi na wotu kwan bɔ kwan do beda pata ase na wodzi famufamu edziban. Dem ntsi dem nsatofrefo wɔ kyefa kese bi a ɔwɔ de wɔhwe hɔnyie. ɔnam Allah ɔsorsornyi No N’adom ntsi, nsatofrefo pii wɔ ho a wɔba Jalsa ara keke, wonnyi siantsir biara. Na nde Jalsa kɔ no bo akɔ sor papaapa. Mbom wotua ho kaw naaso ɔmmfa hɔn ho. Ntsi ɔye nhye ma hen de yedze obu ma ahɔho yi. Woyinom nye ahɔho a wɔse obu a ɔkrɔn mapa. Hɔn tsirmupɔw nye de wobonya Allah na No Somafo no enyimpa.

Ber a orutu fo wɔ asem yi ara ho wɔ ber bi mu no, Anohoba Mesia (ANN) no kaa de: Hwe, nsatofrefo pii ebodwir. Binom inyim hɔn na ekaa hɔn na binom so nntse dem. Ntsi adzɛpa a ɔwɔ de eye nye ekyere ahobrase na ehu obiara de ɔse obu na enyimnyam. Motwer hom wɔ papaye mu na megye dzi de hom bema nsatofrefo enya ahomka biara a ɔfata. Hom nsom ahɔho de mbre wobotum. Na ahɔho yi nyinara ye Anohoba Mesia(ANN) dze na wɔba ha pɛpɛpɛ de gyedzi ntsi. Hɔn tsirmupɔw nye de wobonya Nyankopɔn N’enyimpa na N’enyigye. Dem ntsi ɔwɔ de yetsie nkwankyere a ofi Anohoba Mesia (ANN) ho na hen enyi nsɔ enyidadopa a ɔrohwehwe fi hen nkyen no. Na hen akoma nnya atsenkapa na ɔpɛpa ama yeasom ahɔho no de mbre hen ahom botum. Na aber biara hen akoma wɔ de yedze adwen bi hye mu de hen nsatofrefo wɔ hɔn kyefa.

Beebiara a wɔdze dwumadzi bi behye hen nsa de yendzi no yebɔbɔ mbɔdzen edzi ama nsatofrefo no. Dem adwen yi wɔ de ɔhen edwumayenyi biara n’akoma na n’adwen mu ama enyidadopa a Anohoba Mesia (ANN) wɔ no wɔ hɔnho no ahye ma. Ama yeetum aka de “O! Mesia (ANN) a Nyankopɔn soma no, na O! Nkɔmhyenyi Krɔnkrɔn Muhammad (NNN) no Nokwar Dɔfo yeetu henho ama de yebedzi wo kwankyerɛ biara na w’afotu do”. Ampaara iyi nye adze pɔkyee a wohia fi Ahmadiyyanyi ho. Akwantu a ɔbor mfe ɔha nnkema yeeguan efi w’enyidadopa a ofi hen nkyen ho. Nde ara mpo hen mba, hen mbrentse, hen nkɔdaa na hen mbasiafo nyinara robɔ mbɔdzen de wɔbehye hɔn dwumadzi biara ma de mbre ahom botum na ɔye Nyankopɔn Ne pɛ a wɔbɔkɔ do aye iyi.

Ohia de aber biara yedze dem ɔpɛye yinaawerehyemu na yaw a Anohoba Mesia (ANN) wɔ yi to hen adwen do. Yere ma dem adwen yi edzi hen bano no, ɔwɔ de ye ye aso de, “Aber biara ɔye me atsetsee de nsatofrefo bohu amandze wɔ yaw anaa nkotroka mu”. Ampaara aber biara mutu fo na wɔw do de kwan biara mu wɔbema ahɔho no enya ahoto biara. Nsatofrefo n’akoma nnkyer bɔ; ɔtse de bɔdambɔ sin, se ennsuo mu yie ketseketse mpo a ɔbɔbɔ. Dem ntsi iyi ye afotu a ohia papaapa. Onnyi de iyi ye hen ano famfa ara. ɔwɔ de yedze kɔ nyee do ma ɔye hen mfatoho. Jalsa si wɔ ɔman biara mu, mbom nkanka ara ha dze nkorɔfo a wofi wiadze ne fenandze nyinara ba ha na hɔn apɛdze na hɔn enyidado; na iyi gyina mbeambea a wofi na mbre hɔn yebea tse, eso mbre wosi ko kodzen no so ye soronko. Kwan a wodua do kasa na mbre wosi kyere hɔn enyigye na hɔn ayewdzi so ye soronko. Hɔn ehiadze na dza wɔpɛ nyinara ye soronko. Dem ntsi, yefa nyansakwan a ɔkrɔn do nye hɔn dzi nkitaho.

Dem ntsi na ɔwɔ de yedze Anohoba Mesia (ANN) no n'akwankyerɛ a wɔto no abaw a onnhyia eso ɔye nwanwa hen banodzifo mu. Se yeye setsie ma iyi a, hen dwumadzi nyina bɔkɔ do tɔtsenn de. "Nsatofrefo n'akoma nnkyer bɔ, ɔtse de bɔdambɔ sin, se ennsuo mu yie ketsekette mpo a ɔbɔbɔ". Se obiara a oetu noho ama de ɔrosom ahɔho suo dem afotu yi mu dzen a, ɔno ntawantawa nketsenketse a osisi daapem no nnkesi, gyede annhwe a nkorkor nkorkor bi. Wɔnnkɔbɔ sombo biara gyede bi a nna obi pe de odzi nsemhun. Dem tsebea yi mu dze, obehia de wɔfa nsiwano dzendzen do.

Mfeda, asem bi sii wɔ Mbaa aponto bi ase. ɔbaa bi a ofi ekyirekyir bae yee basaa wɔ biribi ho. Dem asem yi a osii yi nnye de obi dzi fɔ anaa odzi bimna yerehwe. Dza ɔwɔ de yeye nye de yehu de asem sii ntsi na ɔwɔ de yeye nsesa bi kyen de yedze nkyerekyeremu pii beba. Dem ber yi ohia de yehwe yie wɔ nsatofrefo a wɔwɔ Tabshir mu, mbanyin na mbaa nyina amma wɔammfa obiara annto yaw anaa amandze biara mu. Merekasa fa nsatofrefo a wofi amanadze ho. Mbom nsatofrefo biara ye nsatofrefo. M'aye nsesa bi wɔ edwuma yi ne fa a ɔhwe dem dwumadzi yi do. Dem nsesa yi fa no edwuma no ne nyee ho, na iyi twe waqfeen-e-nau na waqfat-e-nau .Afei Allah N'adom ara waqfeen-e-nau na waqfat-e-nau pii enyin edu mpenpendo a wobotum ayeedwuma a wɔdze ahye hɔn nsa. Binom hwe Jama'at hɔn ahyedze do a etsim na binom so ba ma ɔye mpirempiren nhyehyee no mu.

Mowɔ enyidado de afe yi hen som bedzi mu akyen mfeda dze no. mbom kaa de kankɔ mmba de ebesea enyim anaa dzibewdzifo nko. Mbom yehia de yebɔbɔ mpaama ama Nyankopɔn de N'adom bodwir hen do na aye hen ndzeyee na nsemka ne fa bi na ama yeaye dza yeka na woehyira hen na yeaye edwuma a Nyankopɔn pe de yeye. Na yenhwehwe dem tum yi mfi Nyankopɔn hɔ. Na yensɔr so de mma ber bi mmba a biribi besi a ɔremma yennya ntseasee.

ɔfa no ahɔhɔson ho no, mepɛ de mema ndzemba bi da edzi pefee de, Ahmadiyyafo a wɔtse England nkanka hɔn a wɔtse London no, wɔ de wɔhwe hɔn a wofi amanadze reba no de wɔye hɔn ahɔhoe. Dem ahɔho yi, dodow beye mpem ebiasa (3000). Se wɔma akwantu ho nkrataa nyinara a ɔno hɔn dodow no bɔbor. ɔmmfa ho de UK Ahmadiyyanyi bi wɔdze dwuma bi ahye ne nsa, wɔmbɔ mbɔdzen ara de nyimpa biara a ofi amanadze aba no wɔbefa no de hɔn hɔhoe. UK Ahmadiyyanyi a dwumadzi biara nhye ne nsa no so ye ɔhɔho dze. Mbom nsatofrefo a ofi amanadze wɔde UK Ahmadiyyanyi fa no de no hɔho. Yeka no nsem fofor mu a, ɔtɔfabi a, ɔwɔ de wɔhwe hɔho a ofi amanadze ansaasa wɔahwe UK Ahmadiyyanyi. Mber bi ba a, ɔwɔ de UK Ahmadiyyafo dze hɔn apɛdze bɔ afɔr. ntsi mber nyinara hom nkaa de kansa hom ye nsatofrefo mpo a, gyinabew bi ba ma hom dan beye afrefo. Iyi nnye dwumadzi bi a wɔdze ahye binom nsa- mbom dem adwen yi wɔ de dodowara fa. Se yebotum afa dem adwen yi a, gyede yeye krado de yedze henho bɔbɔ afɔr wɔ dem kwan yi do. Se ɔba no dem a yebohu Kuw a ɔye few papaapa.

Yefa Nkɔmhyenyi Krɔnkrɔn (NNN) n'enumsem bi a, obi nya adwen bi de, ɔwɔ de ɔye ɔfrefo kyen de ɔbeyɛ nsatofrefo. Hadith bi ka de, ɔfrefo ye gyedznyi mapa biara n'ahyensew. Hadith ka de, Nkɔmhyenyi Krɔnkrɔn (NNN) kaa de "nyia biara a ɔgye Allah na Atsenbuda no dzi no wɔ de ɔdze obu na enyidzi soronko ma ɔhɔho." Obiara a wɔammfa obu na enyidzi amma nsatofrefo no, nna ɔye mberew wɔ gyedzi wɔ Allah ne Atsenbuda no mu. ɔnam dem

ntsi, Anohoba Mesia (ANN) no atwe adwen egyina ahohosom mapa do mpɛn pii osiandɛ no Wura na ne Kwankyerɛ ɔnye Kuran Krɔnkrɔn ne nkyerɛkyerɛ. Iyi bɛhyɛ hɛn gyedzi mu dzen.

Wɔ Hadith fofor bi mu no so, Nkɔmhyɛnyi Krɔnkrɔn (NNN) kaa dɛ, dɛ edze serew na enyigye behyia wo nua no yɛ ndzeyɛɛ a ɔkyerɛ tseneneeyɛ. Dem ntsi nda ebiasa a yɛrebedzi no Jalsa yi ase yi, ndzeyɛɛpa ahorow pii ahyɛ mu ma yi, dɛ bɛserew na akyerɛ enyigye so yɛ ndzɛpa. Nhyiamu ahorow na ɔba a dem ndzeyɛɛ yi hia, ntsi dem akwanya yi wɔ hɔ ma afɛfo nye nsatofɛfo nyina.

Medze afotu a no mu yɛ dzen ma hɔn a wɔdze dwumadzi ahyɛ hɔn nsa no dɛ, ber a woridzi nkɔmbɔ anaa wɔreyɛ edwuma bi no wɔmfa serew nye enyigye nyɛ- obi berɛ a, dem ndzeyɛɛ yi ne nyɛɛ yɛ dzen papaapa naaso ɔwɔ dɛ yɛper na yɛ yɛ. Hɔn a wɔdze nyimpakuw bi ahyɛ hɔn nsa no so wɔ dɛ wɔdze serew na enyigye kyere hɔn dɔm a wɔhyɛ hɔn tumdzi ase no. dzibewdzifo no wɔyɛ nhyehyɛɛ ma hɔn ma wɔkedzidzi wɔ bea soronko bi, mbom bea a banodzifo nkumaa nnyi ho kwan dɛ wɔbɛfa biribi wɔ hɔ no, anaadɛ ɔtaa si dɛ sɛ edwumayɛfo bi kɔnom nsu ketsekɛtɛ bi mpo wɔ hɔ a, ɔma nkorɔfo hɔn bo fuw. Dem ndzɛmba yi onnyi kwan dɛ osisi. Kwan biara do no, dɛ mbɛrɛ m'aka no, wɔ edwumayɛ mu no, ndzɛmba pii sisi wɔ hɛn ntamu a ɔtɔ sin, mbom yɛnkaa mber nyinara dɛ, ɔwɔ dɛ supa dzi hɛn kan.

Ampaara dɛ, yɛbɛkyerɛ supa na yɛaserew akyerɛ hɛn ahɔho dze, naaso sɛ yɛdze iyi yɛ hɛn ndzeyɛɛ na yɛdze kɔ nyɛɛ mu a, obenya nsunsuandopa soronko bi wɔ hɛn ahɔho do na ɔdze nsakyerpa a ɔdze dɛw na ahohoahoa soronko bɛba. Iyi bɛkyerɛ tseneneɛ su akyerɛ nsatofɛfo a wɔnnye Kuwmba a wɔbɛba Jalsa no bi no. na ɔbɔkrɔn hɛn tseneneeyɛ sɛ yɛda supa edzi a, na yɛbɛyɛ hɔn a wɔtwetwe Nyankopɔn N'enyimpa no.

Dem ntsi hɔn a wɔdze edwumason bi ahyɛ hɔn nsa nyinara nkaa dɛ, sɛ esom ɔhɔho bi a ɔnkyerɛ dɛ reyɛ obiara adom bi. Mbom dɛ mbɛrɛ Anohoba Mesia (ANN) no aka no, na mara ankasa so m'aka no dada no, na ɔyɛ dza Nkɔmhyɛnyi Krɔnkrɔn no kaa kyereɛ hɛn no, dɛ ɔyɛ ɔhɔho biara ne kyɛfa Na eben nsem na Allah aka afa hia a ohia dɛ yɛbɛhyɛ hɛn ahyɛdze ma?

Ntsi mber nyinara kaa dɛ iyi nye gyinabew a wɔdze ama hɔn a wɔhyɛ hɔn ahyɛdze a ɔfa ahohosom ho ma. Iyi nye gyinabew a ɔwɔ dɛ yɛbɔ mbɔdzen na yɛper dɛ hɛn nsa bɛka wɔ ber a yɛrosom hɛn ahohoe. Iyi nye mpɛnpendo a sɛ yɛnya Nyankopɔn Ne nkyɛn mbɛnɛɛ a, ɔbɛtsentsɛn hɛn ndzeyɛɛ wɔ wiadze yi mu nye ndankɔammba. Ntsi wɔma yɛnkaa dɛ, sɛwɔma hɛn akwanya dɛ yɛnsom Anohoba Mesia (ANN) no n'ahohoe a, nna Allah ɔsorsornyi No rubuei kwan ama hɛn ma yɛabɛka muflayhoon (nkunyimdzi) no ho.

Kɛtseankyɛ Allah ama hɔn a wɔdze hɛnho abɔ afɔr no nyinara, dzibewdzifo nye edwumayɛfo nyinara abɛyɛ dem nkorɔfo no a wonya adom no bi. Nyankopɔn mboa hɛn na ɔntsentsɛn ntotoe biara a wɔreyɛ ama Jalsa yi ma ɔnye nkunyim.

Translated by: 1. Mr. Alhassan Kobina Atta-Wenchie  
(Tutor, Jamiatul Mubashireen, Ghana)

2. Mr. Rasheed Possible Essuman Sahib  
(Second Year Student, Jamiatul Mubashireen, Ghana)

Downloaded from: [www.jamiatulmubashireen.org](http://www.jamiatulmubashireen.org)

Contact: [www.jamiatulmubashireen.org/contact-us](http://www.jamiatulmubashireen.org/contact-us)